

UMS perkukuh kerjasama strategik akademia-industri bersama syarikat luar negara

NSF 19.9.2019 4

KOTA KINABALU: Universiti Malaysia Sabah terus mengukuhkan jalinan kerjasama dengan pihak industri dalam memantapkan keupayaannya sebagai sebuah institusi pendidikan yang berinovatif dan relevan.

Naib Canselor UMS, Prof. Datuk Dr. Taufiq Yap Yun Hin berkata, usaha itu bukan hanya tertumpu di dalam negara sahaja tetapi turut diperluas kepada syarikat-syarikat di peringkat global.

"Untuk itu pada 11-14 September 2019, UMS telah mengadakan lawatan kerja ke Overseas Chinese Town (OCT), sebuah syarikat gergasi milik kerajaan China yang berpangkalan di Bandar Shenzhen dan Hainan bagi membincangkan jalinan kerjasama yang boleh memberi manfaat kepada kedua belah pihak.

"Pada asasnya, pihak OCT sangat mengalu-alukan hasrat kerjasama ini yang menyaksikan intipati perbincangan lebih menjurus kepada kerjasama akademik termasuk peluang latihan industri pelajar UMS di syarikat yang berpengalaman luas dalam industri taman tema serta pembangunan bandar pintar termasuk resort dan hartanah," katanya.

Beliau berkata demikian dalam satu kenyataan di sini, hari ini.

Menurut Prof. Datuk Dr. Taufiq, kehadirannya bersama rombongan UMS ke China juga bagi menyampaikan hasrat kepada ibu pejabat syarikat Huawei Technologies Co. Ltd. untuk meneruskan kerjasama yang sudah terjalin erat sebelum ini.

Katanya, kerjasama itu bukan sahaja



perlu diteruskan tetapi diperluas kepada mana-mana ruang kolaborasi yang boleh dimanfaatkan bersama.

"Pada pertemuan itu pihak Huawei juga telah memberikan taklimat mengenai pengalaman mereka dalam penyediaan teknologi maklumat dan komunikasi (ICT) di beberapa buah hospital pintar di China.

"Dan kebetulan hospital pintar UMS sedang dalam fasa awal pembinaan, justeru saya melihat wujud keperluan bagi mengadakan jalinan kerjasama dengan kepakaran Huawei untuk memastikan kesiapsiagaan Hospital Pintar UMS kelak.

"Sebagai maklum balas, syarikat yang terkenal dalam menghasilkan produk teknologi canggih dan serba

moden itu memaklumkan tentang kesediaan mereka bekerjasama berdasarkan pengalaman dan kepayaan syarikat berkenaan dalam membangunkan beberapa sistem hospital pintar di China," jelas beliau sambil memberitahu ia seiring dengan hasrat UMS ke arah Smart Eco Campus 4.0.

Lawatan kerja empat hari yang diinisiatifkan oleh Pusat Jaringan Industri dan Komuniti UMS itu turut mengunjungi OCT Harbour & Wetland, Shenzhen; Shenzhen Tourism College Jinan University; Konka Group; Zhongliao Village, Sanya Hainan; Lu Hui Tou Park, Sanya, Hainan; dan Hainan Resort Software Community Haikou City.